

# JO Breil/Vuorz

## Reglament

### Num

#### Art. 1

Sut il num JO Breil/Vuorz, exista la comunabla l'organisaziun giuvenila per sport da neiv dil Club da skis e snowboard Breil (CSSB) e dil Club da skis Vuorz (CSV).

### Intent

#### Art. 2

L'organisaziun JO Breil/Vuorz munta:

- da promover il sport da neiv tier la giuventetgna ella regiun Breil-Vuorz-Andiast
- da sustener sportists talentai ed affons che han plascher dil sport d'unviern
- da cultivar collegialitad denter la giuventetgna

### Mieds

#### Art. 3

L'organisaziun JO Breil/Vuorz emprova da contonscher sia intenziun entras:

- organisar eveniments per promover igl intent dall'organisaziun
- instrucziun da sport da neiv
- separticipar a cuorsas ed occurenzas officialas
- recavs digl Uffeci federal per sport
- taxas annualas dils participonts:  
Fr. 100.- sche silmeins in dils geniturs ei commember dil CSSB ni dil CSV  
Fr. 200.- per buc commembers
- contribuziuns voluntarias da sponsurs

### Responsabels

#### Art. 4

Ils responsabels per l'organisaziun JO Breil/Vuorz ein:

- Il coach dall'organisaziun JO Breil/Vuorz
- Il chef JO dil Club da skis ed snowboard Breil
- Il chef JO dil Club da skis Vuorz

Ch'in chef JO ei medemamein coach ei pusseivel e da beneventar.

#### Art. 5

Ils responsabels dall'organisaziun JO Breil/Vuorz han ils suandonts dretgs ed obligaziuns:

- survigilar e coordinar l'instrucziun
- decider davart expensas entochen Fr. 1'000.-
- prender decisiuns unanimamein
- representar l'organisaziun anoviars

### **Art. 6**

Il coach dall'organisaziun JO Breil/Vuorz ha ils suandonts dretgs ed obligaziuns:

- a) survegilar e coordinar tuttas fatschentas administrativas
- b) retscheiver ina indemniziun tenor l'indicaziun digl Uffeci federal per sport
- c) procurar pil quen da gestiun
- d) procurar per igl incasso dallas taxas
- e) tener sil current la gliesta da participonts e menaders
- f) empalar la sesida cun ils menaders
- g) organisar ils cuors per ils menaders
- h) reparter, retrer e mantener las giaccas
- i) representar l'organisaziun enviers igl Uffeci per sport grischun (AVS)
- j) representar l'organisaziun enviers igl Uffeci federal per sport (BASPO)

### **Art. 7**

Ils chefs JO dall'organisaziun JO Breil/Vuorz han ils suandonts dretgs ed obligaziuns:

- a) survegilar e coordinar l'instrucziun
- b) survegilar e coordinar ils menaders
- c) representar l'organisaziun enviers il club.
- d) representar l'organisaziun enviers il vitg dil club.

## **Organisaziun**

### **Art. 8**

Per preparar la sesiun vegnenta ha liug mintg'onn igl atun ina sesida cun ils responsabels ed ils menaders. L'invitaziun alla sesida ha il coach da tarmetter als menaders a scret silmeins 15 gis avon la sesida. La sesida vegn menada entras il coach. Igl ulteriur chef JO procura pil protocol.

Tractandas dalla sesida ein:

- a) Appel
- b) Protocol
- c) Revista dalla sesiun vargada
- d) Mutaziuns menaders
- e) Fixar il programm per la proxima sesiun
- f) Varia

### **Art. 9**

Igl onn da gestiun entscheiva per ordinari igl emprem da matg e finescha ils 30 d'avrel.

Il resultat dil quen da gestiun dall'organisaziun JO Breil/Vuorz vegn repartius sin il Club da skis e snowboard Breil e sin il Club da skis Vuorz en proporziun dils participonts annunziats da mintga club.

### **Art. 10**

Ina revisiun parziala ni totala dil reglament ei resalvada allas suprastonzas dil Club da skis e snowboard Breil e dil Club da skis Vuorz.

## **Ils revisurs da quen**

### **Art. 11**

In revisur da quen dil Club da skis e snowboard Breil ed in revisur dil Club da skis Vuorz controlleschan il quen e dattan rapport alla radunonza generala dils clubs.

## **Participonts**

### **Art. 12**

Per separticipar all'organisaziun JO Breil/Vuorz drova ei l'annada tenor las reglas da Swiss-ski e la lubientscha dils geniturs. La taxa annuala dils participonts vegn fixada alla radunonza generala dils clubs sin proposta dils responsabels dall'organisaziun JO Breil/Vuorz.

### **Art. 13**

Ils participonts dall'organisaziun JO Breil/Vuorz han ils suandonts dretgs ed obligaziuns:

- a) separticipar all'instrucziun da sport da neiv tenor annunzia
- b) separticipar all'instrucziun da gimnastica tenor annunzia
- c) separticipar sin cuosts dall'organisaziun a cuorsas officialas da SST e BSV che vegnan annunziadas entras il coach
- d) ademplir las obligaziuns finanzialas enviers l'organisaziun
- e) procurar sez per las assicuranzas necessarias
- f) vegnir sustenius sco sportist talentau da prestaziun sco suandont:

Las lizenziass per ils curridders dall'JO (entochen 14 onns) vegnan pagadas dil CSSB e dil CSV. La licenza da junior ed elita (naven da 15 onns) sto mintga currider pagar sez.

L'JO Breil/Vuorz paga per mintga cuorsa officiala da BSV, Interregiun, Swiss-ski e FIS ina pauschala da Fr. 20.- per currider. Demai che l'JO Breil/Vuorz paga il daner da partenza, dat ei negina contribuziun per las cuorsas da SST.

Ei vegn risguardau las disciplinas ski alpin, ski nordic e snowboard. Da quei susteniment san curridders profitar, ils quals ein ella vegliadetgna da JO e da Juniors.

Ei vegn pagau mo per cuorsas officialas da SST, BSV, Interregiun, Swiss-ski e FIS. Per cuorsas ch'eiin buca officialas (cuorsas da fatschentas e.a.v.) dat ei neginas contribuziuns.

Alla fin dalla sesiun ei mintga currider sez responsabels per siu susteniment. La damonda per il susteniment ei da tschentar a l'JO Breil/Vuorz entochen ils 30 d'avrel, cun ils mussaments (quittanza, gliesta da partenza ni rangaziun). L'JO Breil/Vuorz decida tenor pusseivladad finanziaala sur dils susteniments.

### **Art. 14**

In participont sa vegnir exclud ord suandonts motivs:

- a) sche las obligaziuns finanzialas enviers il l'organisaziun vegnan buca ademplidas, malgrad dus rimbursaments dil coach
- b) sch'il participont ha cun siu secuntener donnegiau grevamein la reputaziun dall'organisaziun

## **Menaders**

### **Art. 15**

Ils responsabels dall'organisaziun procuran per ils menaders. Ils menaders ston haver las qualificaziuns necessarias per saver instruir ils participonts. Ils menaders ein obligai da frequentar il cuors d'introducziun dalla Scola da sport da neiv Breil-Vuorz-Andiast all'entschatta digl unviern.

### **Art. 16**

Ils menaders dall'organisaziun JO Breil/Vuorz han ils suandonts dretgs ed obligaziuns:

- a) retscheiver la medema indemnizaziun sco tier la Scola da sport da neiv Breil-Vuorz-Andiast
- b) esser ad uras sil plaz da sentupada e setener vid las uras d'instrucziun
- c) setener vid las reglas da FIS e buca bandunar las pistas ufficialas
- d) menar l'instrucziun tenor meglier saver e puder
- e) procurar per in substitut tier in impediment ed annunziar la midada al chef JO
- f) trer en la giacca dall'organisaziun
- g) setener vid il reglament, il qual els retscheivan
- h) separticipar a cuors da Giuventegna e Sport sco suandont:

L'JO Breil/Vuorz paga il cuors fundamental da Giuventegna e Sport dil cantun Grischun a menaders ch'ei prompts da trenar durant dus onns ils giuvenils en halla e sin skis ni cun snowboard. Mintga dus onns paga l'JO Breil/Vuorz maximal Fr. 200.- per in cuors da suczessiun (modul), ils cuosts restonts paga il menader sez. Cuors extraordinaris san vegnir lubi dall'JO Breil/Vuorz.

### **Soluziun**

#### **Art. 17**

La soluziun dall'organisaziun JO Breil/Vuorz san mo las suprastonzas dil Club da skis e snowboard Breil e dil Club da skis Vuorz decider. A caschun d'ina soluziun dall'organisaziun JO Breil/Vuorz van ils daners da cassa, auters tetels da valur ed ulteriur material tenor inventarisaziun en proporziun dils participonts da mintga club dil davos unviern als clubs.

### **Determinaziuns finalas**

#### **Art. 18**

Il reglament avon maun ei vegnius approbaus dalla suprastonza dil Club da skis e snowboard Breil e dalla suprastonza dil Club da skis Vuorz. Il reglament va per la sesiun 2007/08 en vigur.

Breil/Vuorz, ils 12 da fenadur 2007

**Club da skis e snowboard Breil**  
Il president

Aluis Cathomen

**Club da skis Vuorz**  
Il president

Remo Veraguth